

河津縣志卷之一

星野

漢司馬談父子著天官書星野亦天官之支流也其說見於周禮保章氏以星土辨九州之地而未嘗析言其所辨蓋大界則曰九州州中諸國封域於星亦有分焉自星經散佚黃帝巫咸之書世渺得聞後之作堪輿者雖有郡國所入非古數也今其存者惟十二分之次耳稽之左傳后帝遷寶沈於大夏主參唐人是因又云成王滅唐而封太叔故參爲晉星由是觀之河津爲晉魏地則寶沈而分參星無疑且攷

陽府觜參分野見於寰宇志圖書編一統志諸書蒲
州府志云觜參實沈之次絳州志亦觜參實沈之次
河津迭隸三郡則其分野又安得不爲觜參乎或謂
河津當秦晉之交疑入鬼井之分亦非也唐書謂西
河之濱所以設險限秦晉其地上應天關且以一行
山河兩戒之說攷之東井輿鬼鶉首之次爲山河上
流當主秦蜀河津晉分爲北紀山河之曲當主觜參
則仍以觜參爲確而井鬼之分不必牽合也至若李
淳風謂魏徙大梁則西河合於東井秦拔宜陽而上
黨入於輿鬼又皆穿鑿附會之論天文家非之宜矣

茲博採前代天文諸書中言分野者節錄於後非敢
勦說用以質諸裨竈其人者

周禮保章氏實沈晉也

左傳鄭公孫僑對叔向曰遷實沈於大夏主參唐人是
因以服事夏殷及成王滅唐而封太叔焉故參爲晉
星由是觀之則實沈參神也

國語董因對晉文公曰實沈之墟晉人是居所以興也
漢地理志魏地觜觿參之分野也其界自高陵以東盡
河東河內

皇甫謐帝王世紀自畢十二度至東井十五度曰實沈

之次於辰在申謂之涒灘於律爲仲呂斗建在巳今
晉魏分野

唐書天文志觜觿參伐實沈也初畢十度八百四十一
杪四之一中參七度終東井十一度得漢之河東及
古晉魏地

星紀魏地畢觜參

清類分野平陽參分蒲絳吉陽解皆觜參分

圖書編平陽觜參分野

一統志平陽府禹貢冀州之域天文觜參分野

沿革

河津古耿地禹貢冀州之域歷唐虞夏皆爲甸服商祖乙自相遷此爲王都凡七世書云五遷厥邦此其一也周初爲侯國春秋時晉獻公滅之以賜大夫趙夙爲采邑後十傳至獻侯徙中牟戰國時韓趙魏三分晉地邑屬於魏爲皮氏秦分天下爲三十六郡置皮氏縣屬河東郡秦末屬魏豹漢興郡縣多襲秦制邑仍隸河東郡爲皮氏縣新莽天鳳元年更曰延平東漢復爲皮氏三國魏置司州析河東爲平陽郡邑隸焉晉因之仍隸平陽郡北魏真君七年改龍門縣隸

高涼郡太和十一年又分置高涼縣尋復置龍門郡
隋開皇初龍門郡廢以縣隸河東郡唐武德元年於
縣置秦州二年徙秦州來治五年析置萬春縣貞觀
十七年州廢省萬春入龍門隸絳州元和初改隸河
中府宋隸陝西路河中府宣和二年改龍門爲河津
縣此河津名縣之始金初隸河中府貞祐三年改隸
榮州尋復隸河中府元因之皇慶初故城水圯移今
治明隸平陽府蒲州

國朝隸平陽府雍正二年改隸絳州

疆域 舖遞附

縣境東南廣五十里

河面在內

南北袤七十里縣治東至絳

州一百里東北至省城八百六十里至京師一千

八百七十里

東至稷山縣界二十五里

西至黃河岸一十五里河面十里與陝西韓城縣隣

界

南至蒲州府榮河縣界三十五里

北至吉州鄉寧縣界三十五里

西北至禹門渡二十五里

東南至蒲州府萬泉縣界四十里

東北至稷山鄉寧二縣界四十里

西南至榮河縣界三十五里

舖遞

附

總舖在城東二里覺城寺前

東路十里郭樊舖二十里百底舖接稷山界

南路十里蒼底舖二十里小梁舖三十里衛村集賢

舖接榮河界

西北五里辛封村十五里清澗村二十五里至禹門

口渡河接韓城界以上皆孔道

北路三十五里入西磴口抵鄉寧界

東南四十里過李望庄抵萬泉界以上皆小徑

形勝

紫金北鎮峩嶺南橫襟帶河汾控連雍冀左姑射右韓
梁麗秀雄深可稱勝概舊府志云河流環繞山勢盤曲
險扼龍門西河要地

邑中八景

禹門疊浪

龍門大河懸流與巖石相激波濤蹴踴噴雪轟雷所謂
禹門三汲浪也

汾水澄波

汾水千里東來遶城南西注大河宛轉潏回潔如素練

紅蓼春妍

百底名紅蓼灘一名射雁灘唐薛仁貴射雁處也春來
桃杏霏紅川原燦爛望之若流霞然

午芹秋霽

東北山麓下水村清潤椒柿林叢暮秋紅葉滿川碧山
在望天氣晴霽爽曠宜人

雲中煙寺

龍門左扉山頂有塏高出雲外晨昏多煙霞橫帶層封
山隱寺出仰睹如在空中

峪口清泉

北山瓜峪馬谷俱有清流瀑沸響徹林落雲嶼磻道水
石清奇動人武陵仙源之想

疏屬晴嵐

疏屬欹枕汾流爲文中子鼓琴之所山勢迤邐而南每
雨霽雲收暎日嵐光襲人衣袖

平原夕照

文清故里山勢縈廻陳文岡題曰萃秀峯夕陽反照烟
凝山紫綠樹丹崖歷歷可玩

按舊八景曰雲中暮雨仙掌擎月汾水秋風禹門雪
浪疏屬晴嵐姑山夕照雙峯競秀神谷藏春金段成

已有詩見藝文

龍門八景

層樓倚漢

看河樓矗立峯巔高摩蒼穹有吞吐雲雷之概凭欄俯仰覺海天一氣身在混茫中矣

曲棧連雲

東南山麓石逕欹側棧道盤空捫欄而上水光雲氣撲眉宇間左顧則下臨黃流目眩神竦凜不可卽

鳴泉漱玉

石後傾洞若覆屋乳泉滴石上日夜不絕聲琤琤然殊

可聽也高山流水擬援琴而和之

飛閣流丹

閣倚丹崖翼然臨河空際風起浪翻勢欲搖動憑欄檻
擬泛畫舫焉

懸崖掛月

官亭左側峯巒高下欽嵌三五月初上恍從巖隙窺人
溶然一波如開曉奩也

空谷驚雷

河衝山斷巨峽竈曲以深試以爆竹霹靂聲奔走岩谷
聽者錯愕久之

秋水歸帆

潦水方盡河勢漸平風帆煙艇出沒於水雲縹緲中謝眺詩天際識歸舟好景不必在江南也

春鱗汲浪

桃花浪暖正魚龍變化之期鬚鬣騰凌髣髴波濤起伏間爾雅三秦記所傳靈異洵不誣云

河津縣志卷之二

山川 水利 津梁附

姑射山在縣東北三十五里卽列子藐姑射之山東起於臨汾縣界綿亘數邑而止於縣之東北黃頰午芹等山其旁支也

黃頰山在縣東北三十五里卽文中子東臯子隱居之處山半有袁達寨一峯屹峙前爲傍通峪峪口東西山對峙入峪二百武山迴礪曲峯巒四合東巖下有新舊石城巖仰出似抱腹城倚巖甃石爲之新城北有石壁高四丈中開罅相距尺許內有石潭似仰甕